

Izjava: Radna grupa za Srebrenicu mora završiti rad u narednih deset dana

Viši zamjenik Visokog predstavnika Martin Ney danas je u Sarajevu održao sastanak sa predsjednikom Vlade RS Perom Bukejlovićem, ministrom unutrašnjih poslova Darkom Matijaševićem, ministrom odbrane RS Milovanom Stankovićem i predsjedavajućim Radne grupe Vlade RS za Srebrenicu Jovanom Spaićem. Ambasador Ney je podsjetio prisutne da Radna grupa za Srebrenicu mora uspješno završiti svoj rad do kraja ovoga mjeseca.

Ambasador Ney je izrazio zabrinutost zbog nedostatka pomaka do kojih je trebala doći Radna grupa, koja je u aprilu ove godine zadužena od strane visokog predstavnika da osigura da Ministarstvo unutrašnjih poslova i Ministarstvo odbrane obezbijede pune informacije o jedinicama koje su bile aktivne u širem području Srebrenice u toku jula 1995. godine. Podgrupa koja je bila odgovorna za vršenje procjene nivoa saradnje organa RS navela je kako je metodologija rada koju je primjenjivalo Ministarstvo odbrane RS bila nedovoljna i da se Međunarodnom tribunalu i domaćim tužiocima može obezbijediti više informacija.

«Radna grupa za Srebrenicu je načinila pomake, ali malo je vremena – Radna grupa treba da završi svoj zadatak do kraja septembra. Mi smo utvrdili preostale zadatke i Vlada RS mora uraditi sve što je u njenoj moći da osigura da Radna grupa uspješno okonča svoj zadatak», rekao je ambasador Ney danas. «Ovaj sastanak je održan da se osigura uspjeh Radne grupe za Srebrenicu; do isteka roka ostalo je deset dana. Ovo je Radna grupa Vlade RS i stoga ćemo predsjednika Vlade smatrati odgovornim u slučaju neuspjeha, jer uspjeh Radne grupe zavisi od saradnje sa Vladom».